


醫
西
說
會
編



醫說續編卷第十三

崑山周恭輯

內傷門

傷酒頭疼寒熱

子和曰一酒病人頭痛身熱惡寒狀類傷寒診其脉
兩手俱洪大三兩日不圍予以防風通聖散約一兩
水一中椀生薑二十餘片葱鬚根二十莖豈豉一大
撮同煎三五沸去粗稍熱分作二服先服一服多半
須臾以釵股探引咽中吐出宿酒香味尚然約一兩
掬頭上汗出如洗次服少半立愈內經曰火鬱發之
發謂汗之令其疎散也

傷冷酒

戴人出游道經陽夏縣間一舊友病已危矣戴人往視之其人曰我別無病三年前當隆暑時出村野有以煑酒餽予者適村落無湯器冷飲數升便覺左脇下悶漸痛結硬至今不化鍼灸磨藥殊不得力戴人診其兩手脈俱沉實而有力先以獨聖散吐之一湧二三升色如煑酒香氣不變後服和脾散去濕藥五七日百脉冲和始知鍼灸無功徒增苦楚矣並儒門事親

酒傷胃滿發熱

一飲酒人胃大滿發熱夜譫語類傷寒右脉不如左大與補中益氣湯去黃耆柴胡升麻加半夏以黃芪補氣柴胡升麻又升故去之服後病愈因食涼物心痛於前藥中加草苴菟數粒愈

內傷汗下後發譫語

一人本內傷汗下後譫語初能認人後三五日語後便妄言此神不守舍慎勿攻擊脉多細數不得睡足冷氣促面褐青色必乾燥用補中益氣湯加人參半兩竹葉三十片煎服效並治法

酒毒病身輕如飄

王經歷患身輕飄飄若行空虛中易醫凡五七十人皆以為風虛與熱劑勢轉加周子固曰此酒毒也卽以寒涼之劑驅之隨愈九靈山房集

飲食自倍腸胃乃傷

羅謙甫曰癸丑歲予隨王承應至瓜忽都地面住冬有博兒赤馬刺約年三旬有餘因獵得兔以火炙食

之各人皆食一枚惟馬刺獨食一枚半抵暮至營極困倦渴飲潼乳斗餘是夜腹脹如鼓疼痛悶亂臥而欲起起而復臥欲吐不吐欲瀉不瀉手足無所措舉家驚荒請予治之具說飲食之由診其脉氣口大二倍於人迎乃應食傷太陰經之候也右手關脉又且有力蓋燒肉乾燥因而多食則致渴飲乾肉得潼乳之濕是以滂滿於腸胃腸胃乃傷非峻急之劑則不能去遂以備急丸五粒覺腹中轉矢氣欲利不利復投備急丸五粒又與無憂散五錢須臾大吐又利十餘行皆物與清水相合而下約二斗餘腹中空快漸漸氣調至平且以薄粥飲少少與之三日後再以參朮之藥調其中氣七日而愈或曰用峻急之藥汝家

平日所戒今反用之何也予曰理有當然不得不然內經曰水穀入口則胃實而腸虛食下則腸實而胃虛更虛更實此腸胃傳化之理也今飲食過節腸胃俱實胃氣不能腐熟水穀脾氣不能運化三焦之氣不得升降故成傷也大抵內傷之理傷之微者但減食一二日所傷之物自得消化此良法也若傷之稍重者以藥內消之傷之太重者以藥除下之痺論有云陰氣者靜則神藏躁則消亡飲食自倍腸胃乃傷今因飲食太過使陰氣躁亂神不能藏死在旦夕矣孟子云若藥不瞑眩厥疾弗瘳峻急之劑何不可之有或者然之

內傷誤汗溫中益氣治驗

中書左丞相史公天澤年六旬有七至元九月間因
內傷自利數行覺肢體沉重不思飲食嗜臥懶言語
舌不知味腹中疼痛頭亦痛而惡心醫以通聖散大
作劑料服之覆以厚衣遂大汗出前證不除而反增
劇易數醫四月餘不愈召羅謙甫治之謙甫診得六
脈沉細而微弦不欲食食即嘔吐中氣不調滯於升
降口舌乾燥頭目昏眩肢體倦怠足脘冷臥不欲起
丞相素不飲酒肢體本瘦又因內傷自利又復獲汗
是重竭津液脾胃愈虛不能滋榮周身百脉故使然
也非甘辛大溫之劑則不能溫養其氣經云脾欲緩
急食甘以緩之又脾不足者以甘補之黃芪人參之
甘補脾緩中故以爲君形不足者溫之以氣當歸辛

溫和血潤燥木香辛溫升降滯氣生薑益智草薤薹
仁辛甘大熱以蕩中寒理其正氣白朮炙甘草橘皮
甘苦溫乃厚腸胃麥蘖麴寬腸胃而和中神麴辛熱
導滯消食爲佐使又件哎咀一兩水煎服之嘔吐止
飲食進越三日前證悉去左右侍者曰前證雖去九
日不大便如何謙甫曰丞相年高氣弱既利且汗脾
胃不足陽氣虧損津液不潤也豈敢以寒涼有毒之
劑下之仲景曰大發汗後小便數大便堅不可用承
氣湯如此雖內結宜以蜜煎導之須臾去燥糞二十
餘塊遂覺腹中空快上下氣調又以前藥服之喜飲
食但有所傷則以橘皮枳朮丸消導之至月餘其病
乃得平復丞相曰病既去矣當服何藥以防其復來

謙甫曰不然但慎言語節飲食不可服藥夫用藥如用刑民有罪則刑之身有疾則藥之無罪妄刑是謂虐民無病妄藥反傷正氣軍志有曰允當則歸服而舍之可也丞相悅而然之其藥名參朮調中湯

候治內傷變成陽證

真定府趙吉夫者約年三旬有餘至元丙寅五月間偶因勞役飲食失節傷損脾胃時發煩躁而渴又食冷物過度遂病身體困倦頭痛四肢逆冷嘔吐而心下痞醫者不審見其四肢逆冷嘔吐心下痞乃用桂末三錢七熱酒調服仍以綿衣覆之作陰毒傷寒治之須臾汗大出汗後卽添口乾舌澀眼白睛紅項強硬肢體不柔和小便淋赤大便秘澁循衣摸牀如發

狂狀問之則言語錯亂視其舌則赤而欲裂朝輕暮劇凡七八日家人輩自謂危殆不望生全鄰人吉仲元舉予治之診其脉六七至知其熱證明矣遂用大承氣湯苦辛大寒之劑一兩作一服服之利下三行折其勝勢翌日以黃連解毒湯大苦寒之劑二兩使徐徐服之以去餘熱三日後病十分中減之五六更以白虎加人參湯約半斤服之瀉熱補氣前證皆退戒以慎起居節飲食月餘漸得平復內經曰凡用藥者無失天時無逆氣宜無翼其勝無贊其復是謂至治又云必先歲氣無伐天和當暑氣方盛之時聖人以寒涼藥急救腎水之原補肺金之不足雖有客寒傷人仲景用麻黃湯內加黃芩知母石膏之類發黃

發狂又有桂枝湯之戒况醫者用桂末熱酒調服此所謂差之毫釐繆以千里逆仲景之治法經云不伐天和不贊其復不翼其勝不失氣宜不然故病未已新病復起矣

內傷變成陰證亦作五虛證

至元己巳六月予住夏於上都僉院董彥誠年踰四旬因勞役過甚煩渴不止及飲潼乳又傷冷物遂自利腸鳴腹痛四肢厥冷冷汗自出口鼻氣亦冷六脉如蛛絲時發昏憤衆太醫議之以葱熨臍下又以四逆湯五兩生薑二十片連鬚葱白九莖水三升煮至一升去粗涼服至夜半氣溫身熱思粥飲至天明而愈玉機真藏論云脉細皮寒氣少泄利飲食不入此

謂五虛漿粥入胃則虛者活信哉魯齋許先生聞之歎曰病有輕重方有大小治有緩急僉院之證非大方從權急治則不能愈也至真要大論云補下治下制以急急則氣味厚此之謂也

用熱遠熱從乎中治勞倦傷冷

郝道寧友人劉巨源時年六十有五至元戊寅夏月因勞倦飲食不節又傷冷飲得疾醫者往往皆以四時證治之不愈逮十日道寧請羅謙甫治之診視曰右手三部脉沉細而微太陰證也左手三部脉微浮而弦虛陽在表也大抵陰多而陽少今所苦身體沉重四肢逆冷自利清穀引衣自覆氣雖布息語言卻懶此脾受寒濕中氣不足故也仲景言下利清穀急

當救裏宜四逆湯溫之內經復有用熱遠熱之戒口
乾但欲漱水不欲嚥早晨身涼而肌生粟午後煩躁
不欲去衣昏昏睡而面赤隱隱紅斑見於皮膚此表
實裏虛也內虛則外證隨時而變詳內外之證乃飲
食勞倦寒傷於脾胃非四時之證明矣治病必察其
本今適當大暑之時而得內寒之病以標本論之時
令標也病本也用寒則順時而違本用熱則從本而
逆時此乃寒熱俱傷必當從乎中治中治者溫之是
也遂以錢氏白朮散加升麻就本方葛根甘草以解
其斑少加白朮茯苓以除濕而利其小便人參藿香
木香安脾進飲食咬咀每服一兩煎服再服斑退而
身溫利止而神出次服異功散治中湯辛溫之劑一

二服五日得平止藥主人曰病雖少愈勿藥可乎羅
君曰藥攻邪也內經曰治病以平爲期邪氣旣去強
之以藥變證隨起不若以飲食調養待其真氣來復
此不藥而藥不治而治之理存焉從之旬日良愈噫
謙甫之爲醫深究內經之旨以爲據依不爲浮議之
所搖曾中了然而無所滯豈驗方而用藥者比也巨
源友舊朝夕往視之故得其詳不可不錄之以爲戒
五月廿五日郝道寧謹題

並寶鑑

啖馬肉過傷

茶商李富人也啖馬肉過傷腹脹醫以大黃巴豆施
治之轉劇抱一翁項彥章後至診之寸口脉促而兩
尺將絕彥章曰曾有新邪故脉促宜引之上達今反

奪之誤矣急飲以涌劑且置李中座使人環旋頃吐宿肉仍進神芎丸大下之病去衆醫咸曰予所不及也

愚按羅謙甫治赤馬刺食炙兔內傷視其脉氣口大二倍於人迎關脉尤有力乃用備急丸大黃巴荳之劑及無憂散上吐下利始平復項彥章治食馬肉服大黃巴荳病轉劇診其脉寸口促而兩尺將絕以爲胸有新邪故脉促宜引之上達次復利之以徹餘垢而愈所謂上部有脉下部無脉其人當吐者是也夫傷物一也而治之不同藥之有異何哉由乎脉之異而已天下之醫治病有不由脉以有限之藥應無窮之病者吾不知其何謂也舉

此一端以證其弊學醫君子其可不盡心焉

內傷不足惡風發熱

淵帥胡公病發熱惡風而自汗氣奄奄弗屬諸醫作傷寒治發表退熱而病益增項彥章診其脉陰陽俱沉細且微數處以補中益氣之劑醫止之曰表有邪而以參芪補之邪得補而愈盛必死此藥矣彥章曰脉沉裏病也微數者五性之火內扇也氣不屬者中氣虛也是名內傷經曰損者溫之飲以前藥而愈

靈山房集

傷食煎燂

丘仲山女譏八歲病傷食煎燂內閉悶口乾唇舌燥黑腹痛不可忍或以剛燥丸藥利之而痛閉益甚滑

伯仁遂以牽牛大黃清快藥爲丸以伏其燥利而愈

內傷外感

淮南丞相方國瑛分省四明聞櫻寧生名禮致見之館穀留城中一日公壻戴穎紳以使事往奉化雪中且進冷食病內外傷惡寒頭痛心腹疼而嘔診之脉沉且緊時伏而不見曰在法下利清穀當急救裏清便自調當急救表今所患內傷冷飲食外受寒冷清便自調救表最急以桂枝湯力微遂爲變法與四逆湯服之晬時服附子一兩明日則脉在肌肉唯緊似若外證已去內傷獨存乃以丸藥下去宿食後調中氣數日即安

並白雲集

痿門

諸痿起于肺熱

諸痿皆起于肺熱傳入五藏散爲諸證大抵只宜補養若以外感風邪治之寧免實實虛虛之禍乎

治法

論治痿法

或問治痿之法獨取陽明二經何也趙良仁曰諸痿生于肺熱只此一句便見治法大意經曰東方實西方虛瀉南方補北方此以因就生剋言補瀉而大經大法不外于此蓋東方木肝也西方金肺也南方火心也北方水腎也五行之中惟火有二腎雖有兩水居其一陽常有餘陰常不足故經曰一水不勝二火理之必然金體燥而居上主氣畏火者也土性濕而居中主四肢畏木者也火性炎上若嗜慾無節則水

失所養火寡于畏而侮所勝肺金得火邪而熱矣木性剛急肺受邪熱則金失所養木寡于畏而侮所勝脾土得木邪而傷矣肺熱則不能營攝一身脾傷則四肢不能爲用而諸痿之病作矣瀉南方則肺金清而東方不實何脾傷之有補北方則心火降而西方不虛何肺傷之有故陽明實則宗筋潤能束骨而利機關矣治痿之法無出於此駱龍吉亦曰風火相熾當滋腎水東垣先生取黃柏爲君黃芪等補藥爲輔佐而無一定之方有兼痰積者有濕多者有熱多者有濕熱相半者有挾寒者臨病制方其善於治痿乎雖然藥中肯綮矣若將理失宜聖醫不治也但是患痿之人若不淡薄食味吾知其必不能安全也

藥要或問

誤治痰氣變成痿厥

丹溪云東陽吳子方年五十形肥味厚且多憂愁脈常沉澀自春來得痰氣病醫認爲虛寒率與燥熱香竄之劑至四月間兩足弱氣上衝飲食減召予治之予曰此熱鬱而脾虛痿厥之證作矣形肥而脈沉未是死證但藥邪太盛當此火旺實難求生且與竹瀝下白朮膏二劑氣降食進一月後大汗而死

論餘

吐痰

子和曰陳下一武弁宋子玉因駐軍息城五六月間暴得痿病腰膝兩足皆不任用臂而不行求治于予察其兩手脈俱滑大而有力予憑內經火淫於內治以鹹寒以鹽水越其膈間寒熱宿痰新者爲熱舊者

為寒或宿食宿飲在上腕者皆可涌之宿痰既盡因而下之節次數百行覺神志日清飲食日美兩足漸舉腳膝漸伸心降腎升更繼以黃連解毒湯加當歸等藥及瀉心湯涼膈散柴胡飲子大作劑煎時時呷之經曰治心肺之病最近用藥劑不厭頻而少治腎肝之病最遠用藥劑不厭頓而多此法人皆怪之然予治痿尋常用之如拾遺物予若以此誑人其如獲罪於天何此宋子玉之證所以不得不書也且示信於來世

利痿

宛丘軍校三人皆病痿積年不差腰已下腫痛不舉遍身瘡疥兩目昏暗唇乾舌燥求療於戴人戴人欲

投瀉劑二人不從為他醫溫補之藥所惑皆死其同病有宋子王者俄省曰彼以熱死我其改之竟從治之而愈戴人曰諸痿獨取陽明陽明者胃與大腸也此言不止謂鍼也鍼與藥同也

並儒門事親

服剛劑病痿證

夏子韶妻始病瘧當六七月他醫以為脾寒胃弱久服桂附後瘧雖退而積火燔熾致消穀善饑日數十飯猶不足終日端坐如常人第目昏不能視足弱不能履腰胯困軟肌肉虛肥至冬初子韶謁櫻寧生往候脈洪大而虛濡曰此痿證也長夏過服熱藥所致蓋夏濕令當權剛劑太過火濕俱甚肺熱葉焦故兩足痿易而不為用也東垣有長夏濕熱成痿之法當

以此治之食日益減目漸能視至冬末忽自起下榻
行步如故

白雲集

背偃足攣

丹溪曰一村夫背偃僕而足攣已成廢人予視其脉
雙手沉弦而瀉遂以張戴人煨腎散與之上吐下瀉
過月餘又吐瀉交作如此三四次而平復

陰痿

鮑兄年二十餘前陰玉莖挺長腫而痿皮常搨潤磨
股不能行兩脇氣上手足倦弱先以小柴胡大劑加
黃連行其濕熱次畧與黃栢降其逆上之氣其腫漸
收漸減及半但莖中有一塊硬未消遂以青皮一味
為君少加散風之劑末服外以絲瓜汁調五倍子末

傳之而愈

並醫案

陰痿臊臭

一富者前陰臊臭又言連日飲酒腹中不和求東垣
治之曰前陰者足厥陰肝之脉絡陰器出其挺末夫
臭者心之所主散入五方為五臭入肝為臊臭此其
一也當於肝經中瀉行間是治其本後於心經中瀉
少衝乃治其標如惡鍼當用藥除之夫酒者氣味俱
厚能生裏之濕熱是風濕熱合於下焦為邪故經云
在下者引而竭之酒是濕熱之水亦宜決前陰以去
之是合下焦二法治之以龍膽瀉肝湯主之

秘藏

厥門

論治厥病脈法

有陽厥有陰厥陽衰於下卽寒陰衰於下卽熱原病
式中詳之有痰有氣虛有血虛有熱治痰白木竹瀝湯治
熱承氣湯外感加薑汁氣虛者脉細血虛者脉大如葱管
熱厥者脉數外感者脉浮實痰者脉弦治法

厥證

子和曰西華李政之病寒厥其妻病熱厥前後十餘
年其妻服逍遙十餘劑終無寸效一日命予診之二
人脉皆浮大而無力政之曰吾手足之寒時時漬以
熱湯漬而不能止吾婦手足之熱終日以冷水沃而
不能已者何也余曰寒熱之厥也此皆得之貪欲縱
嗜慾遂出內經厥論證之政之喜曰內經真聖書也
十餘年之疑今而釋然縱不服藥愈過半矣僕曰熱

厥者寒在上也寒厥者熱在上也寒在上者以溫劑
補肺金熱在上者以涼劑清心火分處二藥令服之
不輟不旬日政之詣門謝曰寒熱之厥皆愈矣其妻
當不過數月而有娠何哉陰陽皆和故也凡尸厥痿
厥風厥氣厥酒厥可一涌而醒次服降心火益腎水
通血和氣之藥使粥食調養無不差者若其餘諸厥
做此行之慎勿當疑似之間便作風氣相去邈矣

痰厥

一夫病痰厥不知人牙關緊急諸藥不能下候死而
已戴人見之問侍病者曰口中曾有涎否曰有戴人
先以防風藜蘆煎湯調瓜蒂末灌之口中不能下乃
取長蛤甲磨去刃以紙裹其尖灌於右鼻竅中咽然

下咽有聲復灌其左竅亦然戴人曰可治矣良久涎不出遂以砒石一錢又投之鼻中忽偃然仰面似覺有痛斯須嘔噦吐膠涎數升頗腥砒石尋常勿用以其病大非如此莫能動然無瓜蒂亦不可使用宜消息之大凡中風涎塞往往逆上若斷為風專求風藥至寶等丹誤人多矣並儒門事親

暴斃

僵也

普濟寺主僧體無為病斃已三日不知人切其脉右口之陽弦而遲少陰之脉堅而勁不滿四十動而止此寒邪乘於腎肝所致法當以辛甘復其陽為作湯三升頓服遂起對客如不病然一藏已絕去此若干日當復病病即死果死如其日九靈山房集

喉舌門

頷腫喉閉

李襲興稱武德中出鎮潞州許人甄權以新撰明堂示予時有刺史成君綽忽腮頷腫大如升喉中閉塞水粒不下三日矣予屈權救之鍼其右手次指之端如食頃氣息即通明日飲啖如故千金翼按銅人云少商穴在手大指端內側去爪甲角如韭葉今成君綽頷頷腫大如升甄權鍼之立愈病狀少異功效實同李云次指端銅人云大指端未知孰是果鍼少商當在大指端也姑兩存之以俟識者資生經

喉癰

嘉祐中有太傅程公守江夏因母暴患咽中有癰卒

然而長塞氣不通命醫者止可用藥勿施鍼以損之
醫曰咽中氣塞不通豈能用藥藥既下之豈能卒效
故衆醫不敢措治尋有醫博范九思云有藥須用未
使新筆點之癰疽即便差公遂取新筆與之九思乃
以點藥上癰藥到則有紫血頓出漸氣通而差公曰
此達神聖之妙矣公命九思飲而求其方九思大笑
曰其患是熱毒結於喉中塞之氣不宣通病已危甚
公堅執只可用藥不可用鍼若從公意則必誤命若
不從公意固不能施治九思當日曾以小鍼藏於筆
頭中妄以點藥乃鍼開其癰而效也若非如此何以
紫血頓下也公方省而歎曰鍼有却病之功驗於今
日古人云爲將不察士卒之能否則不能決勝爲醫

不察藥之主治則不能便差又將無卒謀遠慮戰無
必勝醫無卒機遠見治無必效也

針灸四書
纏喉風

有人纏喉風食不能下將大麥麵作稀粥令嚥之既
滑膩容易下咽以助胃氣

行義
喉閉灸三里

鄭惟康主簿嘗苦喉閉雖水亦不能下咽灸三里穴
而愈

白僵蠶治喉腫

咽喉腫痛用白僵蠶直者不拘多少炒爲末以生薑
自然汁調服一錢匕吳內翰備急方云余嘗苦此用
之甚效葛彥恢提舉閩中曾患喉痺五八主簿用此

方治之卽安一方調下二錢未通半時許再服立通
吐出頑痰別將大黃一塊慢火炮熟打撲盡灰如一
米厚切片以兩指大一片口內含汁嚥之一食頃再
換一片或患人語不得及自嚥不下卽扶起靠斜仰
坐令人呷藥在口以筆管注入鼻中男左女右注藥
訖隨卽扶令正坐須臾吐涎不卽扶起恐吐自鼻中
出也吐了含嚥大黃如前

喉閉口噤

治急喉閉開口不得者右以黃蠟紙裹巴荳一箇如
患人鼻孔大小中心切破急以寒鼻氣衝入喉中自
破已覺通利卽除去濠守王亞夫方巴荳去殼拍碎
以綿裹隨左右納鼻中卽吐出惡物後有鼻中或生

少瘡亦無害

並百乙方

治喉痺勿緩

子和曰一男子纏喉風腫表裏皆作藥不能下余以
涼藥灌於鼻中下十餘行外以拔毒散傳之陽起石
燒赤與伏龍肝各等分細末之日以新水掃百遍三
日熱始退腫始消

又

一貴婦喉痺蓋龍火也雖用涼劑而不可使冷服爲
龍火宜人火逐之人火者烹飪之火也乃使曝於烈
日之中登於高堂之上令侍婢以火爐坐藥銚子上
使藥常極熱不至大沸通口時時呷之百餘次龍火
自散此法以熱行寒不爲熱病扞格故也大抵治喉

痺用鍼出血最爲上策但人畏鍼委曲傍求瞬息喪命凡用鍼而有鍼瘡宜搗生薑一塊調以熱白湯時呷之則瘡口易合銅人中亦有多灸法然痛微者可用病速者恐遲則殺人故治喉痺之火與救火同不容少待內經云火鬱發之發謂發汗然咽喉中豈能發汗故出血者乃發汗之一端也後之君子母執小方而曰吾藥不動藏府又妙於出血若幸遇小疾而獲效不幸遇大病而死矣母遺後悔可也

又

一婦人病咽喉腫塞漿粥不下數日腫不退藥既難下鍼亦無功戴人以當歸荆芥甘草煎使熱漱之以冷水拔其兩手不及五六日痛減腫消飲食如故咽

喉之病甚急不可妄用鍼藥

並儒門事親

肺熱喉腥治驗

梁濟民因膏粱而厚飲又勞心過度肺氣有傷以致氣出腥臭唾涕稠粘口舌乾燥以加減瀉白散主之難經云心主五臭肺爲腥臭此其一也論曰梁氏膏粱之子因洪飲大熱之氣所傷滋溢心火形於肺金故以桑白皮地骨皮微寒降肺中伏火而補氣用以爲君黃芩知母苦寒治氣息腥臭清利肺氣用以爲臣肺欲收急食酸以收之五味子之酸溫以收肺氣麥門冬甘苦寒治涕唾稠粘口舌乾燥用以爲佐桔梗體輕辛溫治痰逆利咽膈爲使也

病有遠近治有緩急

喉腫下利

征南元帥不潏吉反年七旬丙辰春東征南廻至楚丘諸路迎迓多獻酒醴因而過飲遂腹痛腸鳴自利日夜約五十餘行咽嗌腫痛耳前後赤腫舌本強涎唾稠粘欲吐不能出以手曳之方出言語艱難反側悶亂夜不得臥命予診得脉浮數按之沉細而弦卽謂中書粘公曰仲景言下利清穀身體疼痛急當救裏清便自調急當救表救裏四逆湯救表桂枝湯總帥今胃氣不守下利清穀腹中疼痛雖宜急治之比之咽嗌猶可少待公曰何謂也答曰內經云瘡發於咽嗌名曰猛疽此疾治遲則塞咽塞咽則氣不通氣不通則半日死矣故宜急治於是遂砭刺腫上紫黑血出頃時腫勢大消遂用桔梗甘草連翹鼠粘子酒

製黃芩升麻防風等分咬咀每服約五錢水煮清令熱漱冷吐去之噉之恐傷脾胃自利轉甚再服涎清腫散語言聲出後以神應丸辛熱之劑以散中寒解化宿食而燥脾濕丸者取其不卽施化則不犯其上熱至其病所而後化乃治主以緩也不數服利止痛定後胃中閉塞作陣而痛予思靈樞有云上焦如霧宣五穀味薰膚充身澤毛若霧霧之溉是爲氣也今相公年高氣弱自利無度致胃中生發之氣不能滋養於心肺故閉塞而痛經云上氣不足推而揚之脾不足者以甘補之再以異功散甘辛微溫之劑溫養脾胃加升麻人參上升以順正氣不數服胃中快利而痛止內經云調氣之方必別陰陽內者內治外者

外治微者調之其次平之勝者奪之隨其攸利萬舉萬全又曰病有遠近治有緩急無越其制度又曰急則治其標緩則治其本此之謂也並寶鑑

咽痛拔頂髮

治咽痛至危困以手用力拔頂心髮立通無髮者撮頂心皮劉大夫得此方未試忽一卒苦咽痛不能言亟去其中乃患酒禿卽以意令人用力撮頂心皮遂安是齊方

槐花治咽哽

歐公與梅都官書云咽哽祇用新好槐花於新瓦上慢火炒令熟置懷袖中隨行隨坐臥閑送一二粒置口中咀嚼咽之使喉中常有氣味久之聲自通尺續

咽乾

趙鶴臯妻病咽乾水漿不能下衆醫盡愕周子固以平生所最嗜獨灘鵬卽命烹飪進之授以匕筯入口無所苦而食進病如失九靈山房集

木舌脹

子和曰昔予治一婦人木舌脹其舌滿口諸醫不愈余以銚鍼小而銳者砭之五七度腫減三日方平計所出血幾至盈斗

舌腫

南鄰朱老翁年六十餘歲身熱數日不已舌根腫起和舌尖亦腫腫至滿口比元舌大二倍一外科以燔鍼刺其舌兩傍下廉泉穴病勢轉凶將至顛巖戴人

曰血實者宜決之以銚鍼磨令鋒極尖輕砭之日砭八九次血出約一二盞如此者三次漸血出而痛減腫消夫舌者心之外候也心主血故刺出則愈又曰諸痛痒瘡瘍者屬心火燔鍼艾火是何義也

錢吞咽中不下

一小兒誤吞一錢在咽中不下諸醫皆不能取亦不能下乃命戴人戴人熟思之忽得一策以淨白表紙令卷實如箸以刀縱橫亂割其端作鬚鬢之狀又取一箸縛鍼鈎於其端令不可脫先下咽中輕提輕抑漸探之覺鈎入於錢竅然後以紙卷納之咽中與鈎尖相抵覺鈎尖入紙卷之端不礙肌肉提之而出並儒

門事

重舌

李莫安撫內子夜半忽不能言燭之乃舌下生一舌上急取外臺檢得一方用新真蒲黃羅細末敷之如此五七次即愈須吐去再傳百乙方

喉間肉壘

咽喉間生肉層層相壘漸漸腫起不痛多日乃有竅子臭氣自出遂退飲食用臭橘葉煎湯連服愈危氏方

眼目門

論目不能遠視為陰氣不足

東垣曰能近視不能遠視者陽氣不足陰氣有餘乃氣虛而血盛也血盛者陰火有餘氣虛者氣弱也此老人桑榆之象也能遠視不能近視者陽氣有餘陰

氣不足乃血虛而氣盛也血虛氣盛者皆火有餘元氣不足也火者元氣穀氣真氣之賊也元氣來也徐而和細細如線邪氣來也緊而強如巨川之水不可遏

倒睫拳毛

夫眼生倒睫拳毛者兩目緊急皮縮之所致也蓋內伏熱致陰氣外行當去其內熱并火邪眼皮緩則眼毛立出翳膜亦退用法攀出內臉向外速以三稜鍼出血以左手爪甲迎其鍼鋒立愈

試效方

眼證分表裏

機要曰在腑則為表當除風散熱在臟則為裏宜養血安神暴發者為表而易治久病者在裏而難愈

本方

內外障

眼疾有七十二般內障二十三候外障四十九候病狀一一不同據其疾狀認識既不差錯治療必有所

憑龍木論

蚺蛇膽治目疾

晉顧含養嫂失明嘗藥視膳不冠不食嫂目疾須用蚺蛇膽合計盡不得有一童子以一合授含含開乃蚺蛇膽也童子出門化為青鳥而去嫂目遂差

晉書

目張不瞑

一妊婦因大恐而病既愈目張不瞑汶陽錢乙曰菘郁李酒飲醉則愈蓋目系連肝膽恐則氣結膽橫不下郁李仁去結隨酒入膽結去膽下則目能瞑飲之

果驗宋

目病宜養

千金方云讀書博奕等過度患目者名肝勞若欲治之非三年閉目不視不可得差徒自瀉肝及作諸治終是無效則是目者不可使之勞也古人蓋有養之之法如彭真人龜年嘗患目疾不計晝夜瞪目注視以去昏暗閉之少頃依法再行積功而視秋毫徐真人甲嘗患目疾暗室正坐運睛旋還八十一數閉目集神再運不歇而神光自現狀如金輪永除昏暗施真人自記歌亦云運睛除目暗見抱朴子皆養之之法也若用藥則地黃丸羊肝丸等與當歸芍藥黃連等分爲末以雪水煎濃汁乘熱頻洗者最佳云既效方

鹽精治目

王叔權云予游學會稽絕早觀書晨牌方食久之患目澀倦遊而歸同舍遺以鹽精數次揩目而疾除鹽精且爾則青鹽之治目固也古方用青鹽揩牙因掬在手洗目而目明鹽精乃鹽倉地下之精英資生經

忌食畜獸肝能明目

有人年八十餘眸子瞭然夜讀蠅頭字云別無服藥但自小不食畜獸肝人以本草羊肝明目而疑之九華李鵬飛曰羊肝明目性也他肝不然畜獸臨宰之時忿氣聚於肝肝主血不宜於目明矣參贊

蘭香子治腎膜

廬州彭知錄名大辯番陽人渠乃尊提舉頃在臨安

暴得此疾一醫僧以此藥治之坐間瞭然酬僧百千
因遂傳得屢以治人方用蘭香子洗淨眼乾每用一
粒以筋點大眚頭閉目即覺藥在目內團圓旋轉藥
力過即不轉須臾自隨眵淚出惹翳膜在上如魚眼
然再易一粒以病退為度治赤眼後生翳膜最妙

地黃丸治眼痛

唐丞相李恭公扈從在蜀中日患眼或澀或生翳膜
或即疼痛或見黑花如荳大累累數十不斷或見如
飛蟲翅羽百方治之不效僧智深云相公此病緣受
風毒夫五臟實則瀉其子虛則補其母母能令子實
子能令母虛腎是肝之母今腎受風毒故令肝虛肝
虛則目中恍惚五藏亦然脚氣消中消渴諸風等皆

由腎虛也地黃丸悉主之用生地黃熟地黃各一觔
石斛去蘆防風去蘆枳殼麩炒牛膝酒浸杏仁去皮尖炒黃
入瓦各四兩右為細末不犯鐵器煉蜜丸如桐子大
空心以荳淋酒下五十丸荳淋酒法黑荳半升淨揀
簸炒令烟出以酒三升浸之不用黑荳用此酒煮獨
活即是紫湯也

爛眩風眼

陸景淵之子患爛眩風眼兩眚皆痛淚漬兩頰皆即
成瘡百藥不效因理故書得此方試點之須臾藥淚
俱下循瘡中流出其間有小蟲自此遂愈甚妙黃連
一淡竹葉兩栢樹皮乾用一兩半右三味咬咀以水
二升煎至五合稍冷用滴目兩眚及洗爛處日三四

用並百
乙方

呪偷鍼眼

已結赤腫未成膿者神驗取患人衣衫角以手緊捻定於所患眼大眥上搵之每一搵卽念一聲移甚底移擲眼如此一氣念七遍搵七遍訖卽隨身就手撚令緊打一結結定自然便退直候眼安方解切在志誠不須令病人知呪語或欲自呪自移亦甚可見

目疾宜出血最急

子和曰予嘗病目赤或腫或翳作止無時偶至親息帥府間病目百餘日羞明隱澀腫痛不已忽眼科姜仲安云宜刺上星至百會連以銚鍼刺四五十刺攢竹絲竹空上兼眉際一十刺及鼻兩孔內以草莖彈

之出血三處出血如泉約二升許來日愈太半三日平復如故予自嘆曰百日之苦一朝而解學醫半世尚闕此法不學可乎

偶獲出血愈目疾

昔一士人趙仲溫赴試暴病兩目赤腫睛瞤不能識路大痛不任欲自尋死一日與同儕釋悶坐於茗肆中忽鈎窓脫下正中仲溫額上髮際裂長三四寸紫血流數升血止自怪能通路而歸來日能辨屋脊次見瓦溝不數日復故此不藥不鍼誤出血而愈夫出血者乃發汗之一端也亦偶得出血法耳

偶食物愈目疾

有病目不覩者思食苦苳頓頓不闕醫者以爲有蟲

曾不周歲兩目微痛如蟲行大皆漸明俄然大見又如北方貴人愛食乳酪牛酥羊生魚膾鹿脯猪腊海味甘肥之物皆蟲之萌也然而不生蟲者蓋筵會中多食胡荽蕪荑醬鹵汁皆能殺九蟲此二者亦偶得服食法耳智者讀此當觸類而長之可也

目盲

戴人女僮至西華目忽暴盲不見物戴人曰此相火也太陽陽明氣血俱盛乃刺其鼻中及攢竹穴與前頂五穴大出血目立明

目赤爲火運司天所致

李民範日常赤戊子年火運君火司天其年病目者往往暴盲運火炎烈故也民範是年目大發遂遇戴

人以瓜蒂散湧之赤立消不數日又大發其病之來也先於左目內眥赤發牽睛狀如鋪麻左之右次銳眥發亦左之右赤脉貫瞳子再湧之又退凡五次發亦五次皆湧又刺其手中出血及頭上鼻中皆出血上下中外皆奪方能戰退然不敢觀書及見日戴人云當候秋涼再攻則愈火方旺而在皮膚雖攻其裏無益也秋涼則熱漸入裏方可擒也惟宜暗處閉目以養其神水暗與靜屬水明與動屬火所以不宜見日也蓋民範因初愈後曾冒暑出門故痛連發不愈如是湧泄之後不可常攻使服黍粘子以退翳方在別集中

赤目宜吐

安喜趙君玉因暴赤腫點洗不退偶思戴人語曰凡病在上者皆宜吐乃以茶調散湧之一涌赤腫消散君玉嘆曰法之妙其迅如此乃知法不遠人人自遠法也

目眾

清州王之子年十餘歲目赤多淚衆工不效戴人見之曰此兒病目衆當得之母腹中被驚其父曰妊娠時在臨清被圍戴人令服瓜蒂散加鬱金上涌而下泄各去涎沫數升人皆笑之其母亦曰兒腹中無病何吐瀉如此至明日其目耀然爽明李仲安見而驚曰奇哉此法戴人其日又與頭上出血及眉上鼻中皆出血吐時次用通經散二錢舟車丸七十粒自吐

卻少半又以通經散一錢投之明日又以舟車丸三十粒投之下十八行病更不作矣

偶吐愈赤目

一小兒名德孫眼發赤其母買銅綠欲洗兒目前成家人誤與兒飲之須臾大吐吐訖立開

並儒門事親

觀翳色分經治驗

玉峯學士魏邦彥夫人目翳從下而上病自陽明來也綠非五色之正色殆肺腎合而爲病也乃就畫家以墨調膩粉合成色諦視之與翳色同矣是肺腎爲病無疑乃瀉肺腎之邪而以入陽明之藥爲之使既效而他日復病作者三其所從來之經與翳色各異因詢此必經絡不調目病未已問之果然如所論治

之疾遂不作

劉氏曰若此憑其色究其所兼所本之因處治而不愈者蓋邪蘊日久而實元氣陰氣不足所致也當以王道論治庶可但世俗不能守此理遂致失明者多矣

瞳子散大視物錯亂

戊戌初冬李叔至西京朋友待之猪肉煎餅同蒜醋食之後復飲酒大醉臥於暖炕翌日病眼兩瞳子散大視物無的以小爲大以短爲長卒然見非常之處行步踏空多求醫療而莫之愈至己亥春求治於予予思內經有云五藏六府之精氣皆上注於目而爲之精精之窠爲眼骨之精爲瞳子又云筋骨氣血之

精爲脈并爲系上屬於腦又瞳子黑眼法於陰今瞳子散大者由食辛熱之物太甚故也所謂辛主散熱則助火上乘於腦中其精故散精散則視物亦散大也夫精明者所以視萬物者也今視物不真則精衰矣蓋火之與氣勢不兩立故經曰少火食氣壯火散氣手少陰足厥陰所主風熱連目系邪之中人各從其類故循此道而來攻頭目腫悶而瞳子散大皆血虛陰弱故也當除風熱涼血益血以收耗散之氣則愈矣以滋陰地黃丸主之

並試
効方

目黑白翳

戊申六月徐總管患眼疾於上眼皮下出黑白翳兩箇隱澀難開兩目緊縮而無疼痛兩手寸脉細緊按

之洪大無力知足太陽膀胱為命門相火煎熬逆行
作寒水腎及寒膜遮睛證呵欠善悲健忘噓噴眵淚
時自下面赤而白大便小便數而欠氣上而喘用撥
雲湯黃芪細辛生薑葛根川芎柴胡荆芥穗藁本生
甘草升麻當歸身知母羌活防風黃蘗水煎食後熱
服良愈秘藏

目忽無光

丹溪曰一男子三十五歲九月間早起目忽無光視
物不見急欲視片時卻見人物竟不能辨飲食減平
時之半神思極倦已病五日脉之緩大四至之上重
則散而無力予作受濕處治詢之果然因臥濕地半
月得此證遂以白朮為君黃芪陳皮為臣附子為佐

十餘貼而安

醫案

眼發春夏

一人病眼至春夏便發當作鬱治用黃芩酒浸南星薑製
香附蒼朮俱童便浸連翹各二兩山梔炒一兩川芎童便浸一兩半陳
皮酒浸草龍膽酒蒸蘿蔔子青黛已上四味各半兩柴胡錢三為末
神麴糊丸服之旬月愈治法

氣虛目盲

一老人病目無見丹溪診其脉微甚為製人參膏飲
之目明如常時後數日丹溪復至忽見一醫在庭煉
礪石問之則已服之矣丹溪愕曰此病得之氣大虛
今不救其虛而反用礪石不出此夜必死果至夜半
氣奄奄不相屬而死九靈山房集

眼視物皆倒植

臨川蕭雲泉羽客也偶游鄞造滄洲翁呂元膺告曰
某病兩目視物皆倒植屢謁名醫弗愈元膺曰視一
物為二物視直為曲古人嘗言之視物倒植誠所未
喻也願聞其因曰某嘗大醉盡吐所飲酒熟睡達曙
遂病元膺切其脉左關浮促餘部皆無恙即告之曰
當傷酒大吐時上焦反覆致倒其膽腑故視物皆倒
植此不由外因而致內傷者也法當復吐以正其膽
腑遂授藜蘆瓜蒂散俾平旦湧之湧畢視物不倒植
矣鄞遊集

稻麥芒入眼

治稻麥芒入眼取蟬螬以新布覆目上持蟬螬從布

上摩之其芒出着布上良也千金方

沙塵入眼

治沙塵入眼不得出者取生蠅頭一枚手持其背遂

於眼上影之沙塵自出本草

鍼捲目翳

華川陳明遠患瞽十齡百藥屢嘗而不見效自分為
殘人松陽周漢卿視之曰是翳雖在內尚可治用鍼
從眥入睛背捲其翳下之目欬然辨五色陳以為神

續文粹

左目壅痛

趙良仁云丹溪先生嘗用參膏治一老人目暴不明
昏暗如夜正乃靈樞謂氣脫者目不明是也余亦曾

治一士人患頭風連左目壅痛從戴人法於百會上
星出血皆不效遂在頭偏左之足太陽所過第二行
與上星對平按之痛甚處出其血立愈由是而言鍼
之與藥必切中病所藥與邪對然後可愈蓋前人之
方不過立規矩耳

藥要
或問

醫說續編卷第十三

醫說續編卷第十四

崑山 周恭 輯

口齒門

膽痺即口苦

焦秀才病口苦羅謙甫製龍膽瀉肝湯治之得效內
經云有病口苦名曰膽痺乃肝主謀慮膽主決斷盛
汁三合為清淨之府肝取決於膽膽或不決為之志
怒怒則氣逆膽汁上溢故口苦或熱盛使然也

寶鑑

口臭

遂平尚家一男子年二十餘病口中氣出臭如登廁
雖親戚莫肯與對語戴人曰肺系本主腥金為火所
煉火主焦應使如是也久則成腐腐者腎也此熱極

反兼水化也病在上宜涌之先以茶調散湧去其七分夜以舟車丸瀝川散下五七分比旦而臭斷嗚呼人有病口臭而終其老者世訛以爲肺系偏之與胃相通故臭妄也

牙疼可下

滑州李繼之忽病牙痛皺眉不語藥景先見之曰何不樂曰牙痛藥曰曾記張戴人云陽明經熱有餘也宜大下之乃付舟車丸七十粒服畢遇數知已留飲強飲熱酒數盃藥爲熱酒所發盡吐之吐畢而痛止李大服曰戴人神仙也不三五日又痛再服前藥百餘粒大下數行乃愈

並儒門事親

風腫牙疼

文路公方治牙齒風熱上攻腫痛獨活地黃各三兩末每服二錢水一盞煎和滓溫服臥時再用本草

牙痛宜灸

王教授云有老婦人舊患牙疼人教將兩手掌交叉以中指頭盡處爲穴灸七壯永不疼恐是外關穴也穴本手少陽去腕後二寸陷中泉州一稍子妻舊亦苦牙疼人爲灸手外踝穴近前些子遂永不疼但不

知千金所謂足外踝耶手外踝耶識者當辨之

辛帥舊患傷寒方愈食青梅旣而牙疼甚有道人爲之灸屈手大指本節後陷中灸三壯初灸覺病牙痒再灸覺牙有聲三壯疼止今二十年矣恐陽谿穴也銅人云此穴治齒痛手陽明脉入齒縫中左疼灸右

右疼灸左效

蛀牙疼

昔有為樂清主簿者蛀牙疼不可忍號呼之聲徹于四鄰用藥不效有巧者獻一方用之即安以漢椒為末及巴荳一粒同研成膏飯為丸如棗荳大以綿裹安在蛀牙孔處立效

風熱攻齒

王是齋云予頃任淮西幕府巴西冬被檄來和州至含山縣齒痛大作忽於一刀鑷人處得草藥一捻許以湯泡少時冷煖隨意以手指蘸水挹痛處即定明日若失去予歸因傳得其方後以治人多效用皺面地葱子即本草稀莨又名地菘者霜後收之每用少

許湯泡或云即是鶴虱但本草別有鶴虱差為不同沈存中筆談專辨地菘云其子名鶴虱予之所用正是此物也錢季誠方用鶴虱一枚摺置牙中高監云以米醋煮鶴虱漱口其痛立定尤妙

風蛀牙疼

馬敏叔說一村媪苦牙痛百藥不效用絲瓜兒俗呼為磨蘿燒灰存性為細末擦痛處立止

牙疼方

香白芷

太平州道地者不以多少

硃砂

十分白芷並另研

右為細末入硃

砂拌勻煉蜜如櫻桃大每用一丸擦痛立止廬州郭醫傳云渠親曾累取效盡勝他藥此藥乃濠梁一村婦人以醫治帥母夫人者倉卒不用硃砂及蜜亦可

其功只在香白芷耳趙從簡府判所用只白芷細辛
二味等分亦每作效

齒不出

李莫安撫女子退齒踰年不生甚以為撓因過平江
會李亮卿語之李云予有一方已經試驗用之一月
齒遂生用雌烏雞雄烏雞糞以二雞各畜之收養舊鞋底麻底尤佳
右三物等分燒灰存性研細入麝香少許同研傳於

齒齦

並百乙方

論齒痛為風熱所致

東垣曰劉經歷之內年三十餘病齒痛不可忍須騎
馬外行口吸涼風則痛止至家則其痛復作家人以
為崇神禱於巫師而不能愈病乃濕熱為邪也足陽

明多血多氣加以膏粱之味助其濕熱故為此痛因
立一方不須騎馬常令風寒之氣在齒治其溫熱為
主以新升麻之苦平行陽明經為使牙齒骨之餘以
羊脰骨灰補之為佐麝香少許入肉為引用為細末
擦之痛乃減半又以調胃承氣湯去硝加黃連以治
其本服之下三兩行其痛良愈遂不復作試效方

打動牙齒

治打動牙齒用蒺藜根一味燒灰貼動處瑞竹堂方

手足門

伐指痛

戴人曰麻先生妻病伐指痛不可忍酒調通經散一
錢半夜大吐吐畢而痛減予因嘆曰向見陳五曾病

此醫以為小蟲傷或以草上有毒物手因觸之遷延數月膿盡方已今日觀之可以大笑儒門事親

手指麻木

東垣曰商人杜彥達五月間兩手指麻木四肢困倦怠惰嗜臥乃熱傷元氣也以人參益氣湯主之用黃芪八錢生甘草兩半灸甘草二錢人參兩半升麻二錢白芍三錢五味子十四粒柴胡二錢右咬咀分作四服每服水二鍾煎至一鍾去粗食遠稍熱服神效試效方

手指攣

有貴人手中指攣已而無名指亦攣醫為灸肩髃曲池支溝而愈支溝在腕後三寸或灸風疾多有不灸支溝只灸合谷云資生經

十指拳屬內因

盧砥鏡曰何侍郎有女適夫早世女患十指拳攣掌垂莫舉膚體瘡瘍栗然湯劑雜進飲食頓減幾於半載適與診則非風也乃憂愁悲哀所致耳病屬內因於是料內因藥乃以鹿角膠輩多用麝香熬膏貼痿垂處漸得掌能舉指能伸病漸近安本草

蒲公草治指痛

孫真人云予以貞觀五年七月十五日夜以左手中指背解着庭木至曉痛不可忍經十日痛日深瘡日高大色如熟小豈色常聞長者之論有此方遂依治之手下即愈痛亦除瘡亦即差未十日而平復楊炎南行方著其效云其方取蒲公草搗傳腫上方千金方序

臂腕膝足疼痛

丹溪曰一男子年三十六歲家農業而貧秋深忽渾身發熱兩臂膊及腕兩足及膝皆痛如鍛日輕夜重人與風藥則愈痛血藥則不效惟待死而已予脉之兩手皆濇而數右甚於左問其飲食則如平日形瘦如削蓋大痛而瘦非病也蒼朮錢一甘草三分附子炮一片麻黃半桃仁箇九黃柏錢一煎熟入薑汁些少令熱服至四貼後去附子加牛膝錢一八貼後來告急云氣上喘急不睡痛卻減此時昏黑不得行意其血虛必服麻黃過劑陽虛被發動而上奔當與補血而鎮心遂以四物湯減川芎加人參錢五五味子粒十二以其味酸收斂逆上之氣作一貼服至二貼喘促隨定是夜遂睡

後三日脉之數減大半濇脉如舊問其痛則曰不減然呻吟之聲卻無察其起居無力自謂不弱遂以四物湯加牛膝白朮人參桃仁陳皮甘草檳榔生薑三片煎服如此五十貼而安後因身痛復作飲食亦多又與此藥加黃芪三錢又十貼方全可醫案

手指麻疼

治手足十指疼痛麻木孫盈仲嘗患此其祖善醫云有風而非虛以此藥治之而愈用附子木香右二味等分剉為麤末用薑如常法煎木香隨風氣虛實加減如治足弱去附子用烏頭甚效

臂腿痛

治臂腿之間忽一兩點痛着骨不可忍芫花根研為

細末米醋調隨大小傳之立效醫云此陶成一醫者
方曾以治一婦人產後得此疾者良驗但敷貼不住
須以紙花覆其上用絹帛扎定也並百乙方

足指偏枯

陝帥郭巨濟病偏枯二指着足底不能伸迎東垣治
之至則以長鍼刺委中深至骨而不知痛出血一二
升其色如墨又且繆刺之如是者六七次服藥三月
病良愈試效方

足不能行

列子載偃師造偈云廢其腎則足不能行蓋腎有病
也當灸腎俞或一再灸而不效宜灸環跳風市犢鼻
膝關陽陵泉陰陵泉三里絕骨等穴但按畧痠疼處

卽是受病處灸之無不效也資生經

作勞脚痛

丹溪曰東陽傳文年踰六十性急作勞患腿痛動則
甚予視之曰此兼虛證當補血溫血病當自安遂與
四物湯加桃仁陳皮生甘草牛膝入生薑汁研潛行
散熱飲三十貼而安

足跟痛

一人足跟痛疾有血熱丹溪以血熱用四物湯加黃
栢知母牛膝之類並治法

葳靈仙治足疾

唐貞元中嵩陽子周君巢作葳靈仙傳云先時商州
有人重病足不履地者數十年良醫殫技莫能療所

親置之道傍以求救者遇一新羅僧見之告曰此疾得一藥可活但不知此土有否因爲之入山求索果得葳靈仙也使服之數日能步履其後山人鄧思濟知之遂傳其方本草

遠行脚痛

治遠行脚腫痛方用之可行千里輕便甚妙防風細辛草烏等各爲細末摻在鞋底內如着草鞋卽以水微濕過然後摻藥一法以蚯蚓塗腫處高閣起脚一夕卽愈

治脚汗

治脚汗用楊花着鞋中或如綿絮入在襪內尤佳並百

手足皴裂疼痛

東垣老人路次方城獨樹店客舍有推江軸者皮膚皴裂不任其痛兩手不能執轆足不能履地停轍止宿因制潤肌膏與之卽效明日遂行用珠子瀝青兩白黃蠟八錢乳香二錢麻油二匙如煎膏藥法得所爲妙寶鑑

足心迭出

兩足心迭如腫上面生黑色頭瘡硬如釘子釘了履地不得脛骨生碎眼髓流出身發寒顫惟思飲酒此是肝腎氣冷熱相吞用炮川烏頭末傳之煎葑子湯服效得效方

鬼邪門

論夢與鬼交

大全良方論婦人與鬼交通者由藏府虛神不守故鬼氣得爲病也其狀不欲見人如有對語時獨言笑或悲泣是也脉息遲伏或爲鳥喙皆鬼邪之脉又脉來綿綿不知度數而顏色不變此亦是其候也夫鬼無形感而遂通蓋因心念不正感召其鬼附邪氣而入體與神相接所以時見於夢故治之之法大抵用硃砂麝香雄黃鬼箭虎頭骨辟邪之屬可愈也

著邪精泄

趙以德曰蔣右丞子每夜有夢精泄招予視之連日診脉觀其動止終不舉頭但俯視不正予以爲陰邪相着扣之不肯言其所交之鬼狀其父因問隨出入之童僕乃言一日至城隍廟見一泥塑侍女以手於

其身摩之三五日遂聞病此於是卽令法師入廟毀其像小腹中泥土皆濕其病卽安

藥要或問

鹿角治鬼交

唐同州刺史孟詵云婦人夢與鬼交者鹿角末三指一撮和清酒服卽出鬼精又古今錄驗療妖魅猫鬼病人不肯言鬼方鹿角屑擣散以水服方寸匕卽言實也

草本

灸帶脉卻鬼

王教授云有婦人患赤白帶淋得予鍼灸經初爲灸氣海穴未效次日爲灸帶脉穴有鬼附患身云昨日灸亦好只灸我未著今灸著我我今去矣可爲酒食祭我其家如其言祭之其病如失此實事也予初怪

其事因思晉景公膏肓之病蓋有二鬼焉以其虛勞甚矣鬼得乘虛而居之今此婦人之疾亦有鬼者豈其用心而虛損故有此疾鬼亦乘虛而居之歟灸既着穴其鬼不得不去雖不祭之可也自此有來覓灸者必爲按此穴莫不應手痠疼予知是正穴也令歸灸之無有不愈其穴在兩脇季肋之下一寸八分有此疾者速宜灸之婦人患此疾而喪生者甚多切不可忽若更灸百會尤佳此疾多因用心使然故也經

夢鬼

一婦人年三十四歲夜夢與鬼神交驚怪異常及見神堂陰府舟楫橋梁如此一十五年竟無娠孕巫祈

覲禱無所不至鑽肌灸肉孔穴萬千黃瘦發熱引飲中滿足腫委命于天一日苦請戴人戴人曰陽火盛于上陰水盛于下鬼神者陰之靈神堂者陰之所舟楫橋梁水之用兩手寸脉皆沉而伏知胃中有痰實也凡三涌三泄三汗不旬日而無夢一月而有娠戴人曰予治婦人使有娠此法不誣儒門事親

夢中鬼擊

羅謙甫云國信副使許可道到雄州請予看脉予診之乍大乍小乍短乍長此乃氣血不勻邪氣傷正本官說在路到邯鄲驛中夜夢一婦人着青衣不見面目用手去脇下打了一拳遂一點痛往來不止兼之寒熱而不能食乃鬼擊也予曰可服八毒赤丸本官

言嘗讀名醫錄中見李子豫八毒赤丸爲殺鬼杖子
遂與藥三丸臨臥服明旦下清水貳斗立效

夜夢食餅

進白海青陳慶玉第三子因晝臥水仙廟中夢得一
餅食之心懷憂思心腹痞滿飯食減少約一載餘漸
漸瘦弱腹脹如蠱屢食醫藥及師巫禱之皆不效又
不得安臥乃召羅謙甫治之謙甫診之問其病始末
因思之此疾旣非外感風寒又非內傷生冷將何據
而醫因思李子豫八毒赤丸頗有相當遂合與五十
丸服之下青黃涎斗餘漸漸氣調而以別藥理之數
月良愈不二年身體壯實如故故因錄之此藥可謂
如神

並寶鑑

女夢神交腹滿如振

純孝廟祝楊天成女壽在室病不月迎醫療之不得
其名狀及五閱月其腹如有妊求其脉色卽怪呂元
膺因語之曰汝病非有異夢則鬼靈所憑耳女不答
趨入臥內密語其侍姬曰我去夏乘涼廟廡下薄暮
遇黃衣神心動是夕夢一男子如暮間所見者卽我
寢親狎由是感疾我慚赧不敢以告人醫言誠是也
姬以告元膺膺曰如面色乍白乍赤者鬼也脉乍大
乍小者祟也病因與脉色符雖劇無苦乃以桃仁煎
下血類豚肝者六七枚俱有竅如魚目病已

九靈山房集

禮云女及日乎閨門之內又曰晝不游庭夜行以
燭所以正婦德也謂其深居宮闈以防其微以正

其德豈有他哉彼楊氏固不知此而女以廟廡卽
涼感於陰邪向非呂君之醫能無幃箔之議幾於
殞身噫聖人垂戒可謂深且遠矣

妖氣入腹

東白馬氏婦有妊歷十四月不產形瘠廋且黑松陽
周漢卿脉之曰非孕也乃爲妖之所乘耳以藥下一
物如金魚疾旋已

葛大哥

臨海章安鎮有蔡木匠者一夕手持斧斤自外道遊
東山東山衆所殯葬之處蔡沉醉中將謂抵家捫其
棺曰是我榻也寢其上夜半酒醒天且昏黑不可前
未免坐以待旦忽聞一人高叫棺中應云喚我何事

彼云某家女病損症蓋其後園葛大哥淫之耳卻請
法師捉鬼我與你同行一看如何棺中云我有客至
不可去蔡明日詣主人曰娘子之疾我能愈之主人
驚喜許以厚謝因問屋後曾種葛否曰然蔡遍地翻
掘內一根甚巨斫之且有血煮啖女子病卽痊

輟耕錄

瘡瘍門

癰疽當分經絡

丹溪云治癰疽當分經絡六陽經六陰經有多氣少
血有多血少氣有多血多氣不可一槩論也少陽多
氣少血肌肉難長理宜豫防驅毒利藥亦難輕用請
陳一二成敗之迹以告來者予從叔平生多慮質弱
神勞年近五十忽左膊外側廉上起一小紅腫大約

如栗予視之曰慎勿輕視且先與人參大料作湯二三斤爲好叔未之信謾進小貼數服未解而止旬餘值大風拔木瘡上起一道紅線繞至背胛直抵右胛肋予曰必大料人參少加川芎陳皮白朮等補劑與之後與此方兩閱月而安又東陽李兄子年踰三十形瘦膚厚連得憂患又因作勞且過於色忽足腿外側廉上紅腫其大如栗一醫問其大府堅實與承氣湯兩貼下之不效又一醫教以大黃硃砂生粉草麒麟竭又二三貼半月後召予視之曰脉大實事去矣後果死又李兄年四十餘而面稍白神甚勞忽脇下生一細腫如桃一人教用補劑衆笑且排於是流氣飲十宣散雜而進之旬餘召予視之予曰非惟不與

補藥抑且多得解利血氣俱憊不可爲矣已而果然臀居小腹之後而又在其下此陰中之至陰也其道遠其位僻雖太陽多血氣達不到氣既不到血亦罕至未中年後須預補之若無積補之功其禍多在結痂之後或半年間乃病麓工不察用尋常驅熱拔毒行氣之藥虛虛之禍如指諸掌

發揮并治法

發背愈後而死

無錫華氏年六十患背瘡潰發大如旋盤而色赤想是平日多服金石藥毒發所致問之果然因令侵晨飲羊血三五升始用退熱解毒生氣血之劑燻以生肌膏半月後肌生膿少予因歸令服此藥百餘貼方可安全一月後復來招往視其瘡皮肉已堅厚如常

但食少無力因問前日之藥服幾何曰瘡將平遂止
不服脉之沉微甚因知其氣血止可供給瘡平而已
於真氣則已竭不可治即古人所謂死於瘡結痂之
後果不出半月而死不獨此膿出後之虛若因虛而
發癰疽者亦然藥要或問

背生紅腫連胛

一男子年五十餘形實色黑背生紅腫及胛骨下痛
其脉浮數而洪緊食亦嘔正冬月與麻黃桂枝湯加
酒黃栢生附瓜蒌子甘草節羌活青皮人參黃芩半
夏生薑六貼而消此非內托之意歟

定癰疽死分

一伏兔二腓膈三背四五臑俞五項上六腦七髀八

鬚九頤此事難知

薜荔治發背癰

圖經云薜荔治背癰頃年寓宜興縣張鎮有一老舉
人教村學年七十餘忽一日患發背村中無醫藥急
取薜荔研爛絞汁和蜜飲數升以其津傳瘡上後以
他藥傳貼遂愈醫者云其本蓋得薜荔之力乃知圖
經所載不妄草本

食櫻患背疽

一富家女子十餘歲好食紫櫻每食即二三斤歲歲
如此至十餘年一日潮熱如勞戴人診其兩尺脉皆
洪大而有力謂之曰他日必作惡瘡腫毒熱上攻因
陽盛陰脫之症其家大怒不肯服解毒之藥不二三

年患一背疽如盤痛不可忍其女忽思戴人曾有是
言再三悔過請戴人戴人以銚鍼繞疽暈刺數百鍼
去血一斗如此三次漸漸痛減腫消微出膿而斂將
作痂時使服十補內托散乃痊痊後終身忌口然目
亦昏終身無子

灸疽疽

儒門
事親

郭戶爲予言鄉里有善治發背癰疽者於瘡上灸之
多至二三百壯無有不愈但作艾炷小則人人不畏
灸灸多則作效矣蓋得此法也然亦不必泥此近有
一醫以治外科得名有人發背瘡大如碗有數孔醫
亦無藥可治只以艾遍敷在瘡上灸之久而方疼以
瘡上皆死肉故初不覺疼也旋以藥調治之愈蓋出

於意表也 王蘧疽發於背張生以艾火加瘡上自
旦及暮凡灸一百五十壯知痛乃已明日鑷去黑痂
膿血盡潰膚理皆紅亦不復痛始別傳之以藥日一
易焉易時旋剪去黑爛惡肉月許瘡乃平是歲秋夏
間京師士大夫病疽者七人予獨生此雖司命在然
固有料理不知其方遂至不幸者多矣 予嘗爲劉
和叔序灸癰疽方云必以毒藥攻其內伐其根也又
以火艾灼其外宣其毒也法盡於此矣癰疽始作灼
艾服大黃等藥無不愈者

大黃隨人
虛實服

水蛭治發背

治發背初作取水蛭置腫上飲血腹脹自落別換新
者脹蛭以新水養之卽活矣吳內翰備急方云其蛭

祖仁一日忽覺背瘡赤腫如盃大急用此治之至晚
遂安

夢呂真人神膏治發背

昔嚴州一通判忘其名母病發背祈禱備至夜夢呂
真人服青衣告之曰公極孝故來相告以方更遲一
日不可療矣通判公急市藥治之卽愈用瓜蒌五箇
取子細研乳香五塊如棗子大亦細研以白沙蜜一
斤同煎成膏每服三二錢溫酒化下大治發背諸惡
瘡日進二服無不立效揚王得此方家人凡百瘡毒
依此治之皆效遂合以施人無不驗者漏瘡惡核並
皆治之此卽鄭府朱保義所說神妙方是也

吃蘿蔔治癰疽

宋留丞相云癰疽只吃白煮蘿蔔不拘多少以腫毒
散爲度屢以治人極有神效

並百
乙方

臂癰

東垣曰尹老家素貧已酉歲十月初寒形志皆苦於
手陽明大腸經分出癰初有癰疔其臂外皆腫痛先
腫在陽明左右寸脉皆短中得之俱弦按之洪緩有
力此癰得自八風之變以脉斷之邪氣在表其症大
小便如故飲食如常腹中和口知味知不在裏也不
惡風寒止熱躁脉不浮知不在表也表裏旣和邪氣
止在經脉之中內經曰凝於經絡爲瘡癰其癰出身
半已上風從上受之故知是八風之變爲瘡者也宜
治其寒邪調其經脉中血氣使無疑而已以白芷升

麻湯療之一服而愈炙甘草升麻桔梗白芷當歸稍
生地黃生黃芩酒黃芩連翹黃芪中桂紅花右咬咀
水酒各大盞半同煎服愈

附骨癰

賈德茂小男於左大腿近膝股內出附骨癰不辨肉
色漫腫皮澤木硬瘡勢甚大其左脚乃脛之髀上也
更在足厥陰肝經之分少侵足太陰脾經之分其脈
左三部細而弦按之洪緩微有力以內托黃芪湯主
之生地黃栢肉桂羌活當歸稍土瓜根柴胡梢連翹
黃芪右咬咀水酒煎空心服蘭室秘藏 丁未季春二十
二日蒲津王老年七十因寒濕地氣得附骨癰於左
腿外側足少陽膽經之分微侵足陽明分潤六七寸

長一小尺堅硬漫腫不變肉色皮澤深但行步作痛
以指按至骨大痛以內托黃芪酒煎湯治之一服立
止再日柔軟腫消

腦項發疽記

元好問記曰予素飲酒於九月中患腦之下項之上
出小瘡後數日腦項麻木腫勢外熾瘍醫遂處五香
連翹湯至八日不下而云不可速療十八日得膿出
用藥或砭刺三月乃可平四月如故予記醫經云凡
瘡見膿九死一生果如醫言則當有束手待斃之悔
矣乃請李明之診且謂膏粱之變不當投五香事已
無及當先用火攻之策然後用藥以大艾炷如桃核
許者攻之至百壯乃覺痛次爲處方云是足太陽膀胱

胱之經其病逆當反治脉中得弦緊按之洪大而數
又且有力必當伏其所主而先其所因其始則同其
終則異可使破積可使潰堅可使氣和可使必已必
先歲氣無伐天和以時言之可收不可汗經與病俱
禁下法當結者散之鹹以奠之然受寒邪而禁鹹諸
苦寒爲君爲用甘寒爲佐酒熱爲因用爲使以辛溫
和氣血大辛以解結爲臣三辛三甘益元氣而和血
脉滲淡以導酒濕扶持秋令以益氣瀉火以入本經
之藥和血且爲引用旣以通經爲主用君以黃芩黃
連黃栢生地黃知母酒製之本經羌活獨活藁本防
風防已當歸連翹以解結黃芪人參甘草配諸苦寒
者三之一多則滋營氣補土也生甘草瀉腎火補下

焦元氣人參橘皮以補胃蘇木當歸尾去惡血生地
黃補血酒製防已除膀胱留熱澤瀉助秋令去酒之
濕熱凡此諸藥必得桔梗爲舟楫乃不下沉投劑之
後疽當不痛不拆食進體健予如言服之投牀大斲
日出乃寤以手捫瘡腫減七八至瘡痂都斂十四日
而已世醫用技豈無取效者至於治效之外乃能歷
數體中不言之秘平生所見惟明之一人而已

並試效方

凡治病必察其下

一治背疽
一治腦疽

戊午冬予從軍住冬於城武縣有賈倉使父年踰六
旬冬至後數日疽發於背五七日腫勢約七寸許不
任其痛瘍醫曰視之膿已成可開發矣公懼不從越
三日醫曰不開恐變症生矣遂以燔鍼開之膿泄痛

減以開遲之故迨二日變症果生覺重如負石熱如
熛火痛楚倍常六脉沉數按之有力此膏梁積熱之
變也邪氣酷熱固宜以寒藥治之時月嚴凝復有用
寒遠寒之戒乃思內經云有假者反之雖違其時以
從其症可也與瘍醫議急作清涼飲子加黃連一兩
五錢作一服服之利下兩行痛減七分翌日復進前
藥其症悉除後月餘平復 陳錄判母年七十有餘
亦冬至後腦出痘形可甌面大衆瘍醫診視俟瘡熟
以鍼出膿因答侍妾瘡輒內陷凹一莖葉許面色青
黃不澤四肢逆冷汗出身清時復嘔吐脉極沉細而
遲蓋緣衰老之年嚴寒之時病中苦楚飲食淡薄已
滌肥膿之氣獨存瘦悴之形加之暴怒精神愈損故

有此寒變也病與時同與瘍醫議速製五香湯一劑
加丁香附子各五錢劑盡瘍復大發隨症調治而愈
內經曰凡治病必察其下謂察時下之宜也諸痛痒
瘡瘍皆屬心火言其常也如瘡盛形羸邪高痛下始
熱終寒此反常也固當察時下之宜而權治故曰經
者常也法者用也醫者意也隨所宜而治之可收十
全之功矣

捨時從症 附骨

至元壬午五月王伯祿年踰五旬有七右臂膊腫盛
上至肩下至手指色變皮膚涼六脉沉細而微此乃
脉症俱寒予舉瘍醫孫彥和視之曰此乃附骨癰開
發已遲以燔鍼啓之膿清稀解次日肘下再開之加

吃逆彥和與丁香柿蒂散兩服稍緩次日吃逆尤甚
自利臍腹冷痛腹滿飲食減少時發昏憤於左乳下
黑盡處灸二七壯又處托裏溫中湯用乾薑附子木
香沉香茴香羌活等咬咀一兩半欲與服或者曰諸
痛痒瘡瘍皆屬心火又當盛暑之時用乾薑附子可
乎予應之曰理所當然不得不然內經曰脉細皮寒
瀉利前後飲食不入此謂五虛吃逆者胃中虛寒故
也諸痛痒瘡瘍皆屬心火是言其定理也此症內外
相反須當捨時從症也非大方辛熱之劑急治之則
不能愈也遂授之諸症悉去飲食倍進瘡勢溫濃色
正彥和復用五香湯數服後月餘平復噫守常者衆
人之見知變者智者之事知常而不知變雖細事因
而取敗者亦多矣况醫乎哉守常之變豈可同日而
語哉

汗之則瘡已

丁巳委予從軍廻住冬於曹州界以事至州有趙同
知謂予曰家舅牛經歷頭痛面赤腫耳前後尤甚疼
痛不可忍發熱惡寒牙關緊急涕唾稠粘飲食難下
不得安臥一瘍醫於腫上砭刺四五百餘鍼腫赤不
減其痛益甚不知所由然願請君一見予遂往診視
其脉浮緊按之洪緩此症乃寒覆皮毛鬱遏經絡熱
不得升聚而赤腫經云天寒則地凍水冰人氣在身
中皮膚緻密腠理閉汗不出血氣強肉堅濟當是之
時善行水者不能往冰善穿地者不能鑿凍善用鍼

者亦不得取四厥必待天溫水行凍解而後水可行地可穿人脈亦猶是也又云冬月閉藏用藥多而少鍼石也宜以苦溫之劑溫經散寒則已所謂寒綴腠理以苦發之以辛散之宜以托裏溫經湯麻黃苦溫發之者也故以爲君防風辛溫散之者也升麻苦平葛根甘平解肌出汗專治陽明經中之邪故以爲臣血留而不行者則痛以香白芷辛溫當歸身辛溫以和血散滯濕熱則腫蒼朮苦甘溫體輕浮力雄壯能泄膚腠間濕熱人參甘草甘溫白芍藥酸微寒調中益氣使托其裏故以爲佐依方餌之以薄衣覆其首以厚被覆其身臥於煖處使經血溫腠理開寒乃散陽氣復大汗出後腫減八九分再服去麻黃防風加

連翹鼠粘子腫已悉去經言汗之則瘡已信哉斯言或以仲景言瘡家雖身疼痛不可發汗其理何也予曰此說乃營氣不從逆於肉理而成瘡腫作身疼痛非外感寒邪而作疼痛故戒之以不可發汗若汗之則成瘡矣又問仲景言鼻衄者不可發汗復言脈浮緊者當以麻黃湯發之衄血自止所說不同其故何也願聞其說予曰此議論血正與瘡家槩同且夫人身血之與汗異名而同類奪汗者無血奪血者無汗今衄血妄行爲熱所逼更發其汗反助邪熱重竭津液必變凶症故不可汗若脈浮則爲在表脈緊則爲寒寒邪鬱遏陽不得伸熱伏榮中迫血妄行上出於鼻則當麻黃湯散其表邪使陽氣得舒其衄自止又

何疑焉或者嘆曰知其要者一言而終不知其要流
散無窮潔古之學可謂知其要者矣並寶鑑

腦疽

一婦人年將七十形實性急而好酒腦生疽纔五日
脉緊急且濇急用大黃酒煨細切酒拌炒爲末又酒
拌人參炒入薑汁調一錢重又兩時再與睡覺而上
半身汗睡覺病已失此亦內托之意玉機微義

項瘡

戴人在西華寄食於夏官人宅忽項上病一瘡狀如
白頭瘡腫根紅硬以其微小不慮也忽遇一故人見
邀以羊羔酒飲雞魚醢蒜皆在焉戴人以其故舊不
能辭又忘其禁忌是夜瘡大痛不可忍項腫及頭口

開發狂言目見鬼神夏君甚懼欲報其家戴人笑曰
請無慮來日當平乃以酒調通經散六七錢下舟車
丸百餘粒次以熱麵羹投之上涌下泄一時齊作各
去半盞明日日中瘡腫已平一二日膿出而愈夏君
見大奇之儒門事親

乳癰治法

丹溪曰乳房乃陽明所經乳頭厥陰所屬乳子之母
不知調養怒忿所逆鬱悶所遇厚味所釀以致厥陰
之氣不行故竅不得出陽明之血沸騰故熱甚而化
膿亦有所乳之子膈有滯痰口氣焮熱含乳而睡熱
氣所吹遂生結核於初起時便須忍痛揉令稍軟吮
令汁透自可消散先此不治必成癰癰治法疎厥陰

之滯以青皮清陽明之熱細研石膏行污濁之血以
生甘草之節消腫導毒以瓜蒌子或加沒藥青橘葉
以少酒佐之若加以艾火兩三壯於腫處其效尤捷
彼村工喜於自銜便用鍼刀引惹拙病良可哀憫若
夫不得於夫不得於舅姑憂怒鬱悶所積夕累皮氣
消沮肝氣橫逆遂成核如大梅子不痛不痒數十年
後方爲瘡陷名爲妳岩以其瘡形嵌凹似岩穴也不
可治矣若於始生之際便能消散病根使心清神安
然後施以治法亦有可安之理予族姪婦年十八時
曾得此病察其形脉稍實但性急躁伉儷自諧所難
者後姑耳遂以本草單方青皮湯間以加減四物湯

以行經絡之劑兩月而安

餘論

產後乳癰

一婦人產後患乳癰用香白芷連翹甘草節當歸鬚

赤芍藥青皮荆芥穗

已上各半兩

貝母天花粉桔梗

已上各一

錢瓜蒌半枚作一貼水煎半饑半飽服細細呷之有

熱加柴胡黃芩忌酒肉椒料敷藥用南星寒水石皂
角貝母白芷草烏大黃七味爲膏醋調鵝翎掃敷腫
處效法

五十以上患乳癰

開慶間淦川嘉林曾都運恭人年已五十而病妳癰
後果不起以此知聖賢不妄說也 癸亥年僕處五
羊趙經畧夫人年七十一歲隔一二年前左乳房上

有一塊如鵝卵大今忽然作楚召予議藥僕云據孫真人云婦人年五十歲以上乳房不宜見癰見則不可治矣幸而未破恐是氣瘤漫以五香連翹湯去大黃煎服服後稍減則已過六七年後每遇再腫脹時再合服必消滅矣

並良方

肺癰

武陽仇天祥之子發病寒熱諸醫作骨蒸勞治之半年病愈甚以禮來聘戴人戴人往視之診其兩手脈尺寸皆朝于關關脈獨大戴人曰癰象也問其乳媪曾有痛處否乳媪曰無戴人令兒去衣舉其兩手觀其兩脇下右脇稍高戴人以手側按之兒移身乃避之按其左脇則不避戴人曰此肺部有癰也非肺癰

也若肺癰已吐膿矣此不可動止可以藥托其裏以待自破家人皆疑之不以為然服藥三日右脇有三點赤色戴人連辭云若早治談笑可已今已失之遲然破後方可驗其死生若膿黃赤白者生也膿青黑者死也遂辭而去私告天祥之友李簡之曰十月後卽此兒必有一證其證乃死矣肺死於已至期必頭低不舉不數日果死其父以羣醫斷為骨蒸證戴人獨言其肺有癰終心疑之及其死家人輩以火焚其棺及燃天祥以杖破其脇下果出青黑膿一碗天祥仰天哭曰諸醫誤殺吾兒矣

儒門事親

肺癰咳膿血

予嘗治一婦人年二十餘患肺癰曾膺間患一竅於

口中所咳膿血與竅相應而出必人參黃芪當歸補氣血劑加退熱排膿等藥服之不一月而愈

鍼決腸癰

趙以德云予嘗治上海一婦人因用毒藥去胎後當腹右結塊診其脉洪加塊痛甚有寒熱因疑之使露腹視其塊皆齊高寸許獨此之色光澤痛不可按謂之曰此非塊是瘀血滯溢於腸外膜原之間聚結爲癰者也遂與補氣血行結滯排膿之劑三日後以鋒鍼決之大出膿血內有如糞狀者臭甚病婦驚曰吾腸穿破必死予慰之曰無憂也氣血生肌則內外之竅自愈不旬日而瘳

並藥要或問

脉察腸癰

問曰官羽林婦病醫脉之何以知婦人腸中有癰膿爲下之卽愈師曰寸口脉滑而數滑則爲實數則爲熱滑則爲榮數則爲衛衛數下降榮滑上升榮衛相干血爲濁敗小腹痞堅小便或澇或復汗出或復惡寒膿爲已成設脉遲緊卽爲瘀血血下則愈

千金方

內癰臍凸

童良輔子年十二患內癰腹脹臍凸而頗銳醫欲刺臍出膿其母斬不許抱子獨泣童馳告呂元膺邀與俱及造臥內見一野僧擁爐熾炭燃銅筋二枚烈火中瞪目視元膺曰此兒病癰發小腸苟舍刺臍無他法元膺喻之曰臍神闕也鍼刺所當禁矧癰舍於內惟當以湯丸攻之苟如若言必殺是子矣僧怒趨出

元膺投透膿散一匕明日膿自氣舍潰下繼以十奇湯下善應膏丸浹旬而差

小腸生癰連陰切痛

郡守李孝文妻母龐病小腹痛衆醫皆以爲瘕聚藥之浹月不愈繼命呂元膺診元膺循其少陰脉如刀刃之切手胞門花而數知其陰中痛癰結小腸也卽告之曰太夫人病幽隱不敢叩聞幸出侍人密語之乃出老嫗元膺曰患者苦小腸癰也以故臍下如瘕聚今膿已成腫迫於玉泉當不得前後溲則痛嫗拜曰公神人也所苦一如公言遂用國老將軍爲向導挾麒麟竭琥珀之藥以攻之膿自小便潰應手愈並九靈山房集

燔鍼治腸癰

烏鎮陳氏子腹有幽隱起捫之如罌或以爲奔豚或以爲瘕瘕松陽周漢卿曰脉洪且花癰發於腸也卽用燔鍼如筴者刺入三寸餘膿隨鍼射出其流有聲愈續文粹

脇内生癰

副樞張息軒病傷寒踰月旣下而內熱不已脇及小腹偏左滿肌肉色不變裏醫以爲風毒所中膏其手以摩之浹四旬餘其毒循宗筋流入于辜丸赤腫瘍醫刺潰之而左脇腫痛如故旣選醫之尤良者在門更召呂元膺診元膺以關及尺中皆數滑而且花因告之曰脉數不時則生惡瘡關內逢花則內癰作季

脇之腫癰作膿也經曰癰疽不得頃時回下之順勿
晚乃用保生膏作丸衣以乳香而用硝黃作湯下膿
如糜五升許明日再下餘膿差九靈山房集

肛門生癰

一人肛門生癰後不收口有鍼竅三孔穴邊有膿用
黃芪條芩連翹秦艽右末之神麩丸服治法

灸便毒法

張德俊灸便毒親曾取効云屢以灸他人皆驗以細
草或軟篾一莖隨所患左右手量中指自手掌盡處
橫紋量起通三節至指盡處為則不量指用截斷卻
將此草於手腕橫紋量起引草向臂當中草盡處即
是穴麥粒大灸三壯腫散痛止即時安百乙方

蜚蠊治疔瘡

劉禹錫纂柳州救三死方云元和十一年得疔瘡凡
十四日日益篤善藥傳之皆莫能知長樂賈方伯教
用蜚蠊肉一夕而百苦皆已明年正月食羊肉又大
作再用亦如神效其法一味貼瘡半日許可再易血
盡根出遂愈蜚蠊心腹下度取之其肉稍白是也所
以云食羊肉又大作者蓋蜚蠊食羊肉故耳用時便
禁食羊肉其法蓋出葛洪肘後方也草本

汗下法治疔瘡

東原郭文才治一婦人五十九歲右耳下天容穴間
患一疔瘡其頭黑靨起黃水時流渾身麻木發熱譫
語時時昏沉六脉浮洪用烏金散汗之就以鈹鍼先

刺瘡心不痛周遭再刺十餘下紫黑血出方知疼痛
就將寸金錠子絛入瘡内外用提鍼錠子放於瘡上
膏藥貼護次日汗後精神微爽卻用破棺丹下之病
卽定其疔潰動後用守效散貼塗紅玉錠子絛之八
日其疔自出矣

瘡科
心要

刺疔腫

凡療疔腫皆刺中心至痛又刺四邊千餘下令血出
去血傳藥藥氣得入鍼孔中佳若不達瘡內療無效

玉山韓光疔腫方

韓光治疔腫人也正觀初衛州徐使君訪得此方用
艾蒿一擔燒作灰於竹筒中淋取汁一二合和石灰
如麵漿以鍼刺瘡中至痛卽點之點三遍其根自落

亦大神驗正觀中用治三十餘人得差故錄之

並千
金方

馬刀

襄陵馬國卿病左乳下二肋間期門穴中發瘡硬而
不潰痛不可忍醫瘍皆曰乳癰或曰紅絲漏或曰覷
心瘡使服內托散百日又服五香連翹湯數月皆無
驗國卿偃僕而來求治于戴人遇諸市戴人見之曰
此馬刀也足少陽膽經之病出靈樞十二經以示之
其狀如馬刀故曰馬刀堅而不潰乃邀之於食肆中
使食水浸湯餅國卿曰稍覺緩次日先以滄鹽上涌
又以涼劑滌去熱勢約十數行腫已散矣

朱葛黃家妾左脇病馬刀憎寒發痛已四五日矣戴
人適避暑於寺中來乞藥戴人曰此足少陽膽經病

也少血多氣堅而不潰不可急攻當以苦劑涌之以
五香連翹湯托之既而痛止然瘡根未散有一盜醫
過見之曰我有妙藥可潰而為膿不如此何時而愈
既經毒藥痛不可忍外寒內嘔血不止大便黑色食
飲不下號呼悶亂幾至於死諸姑惶懼夜投戴人戴
人曰當尋元醫者予不能治其王母亦來告至於再
三戴人曰脇間皮薄肉淺豈可輕用毒藥復令洗去
以涼劑下之痛立止腫亦消

瘰癧

一婦人病瘰癧延及胷臆皆成大瘡相連無好皮肉
求戴人療之戴人曰火淫所勝治以鹹寒命以滄鹽
吐之一吐而着痂再用涼膈散解毒湯等劑皮肉乃

復如初

並需門
事親

灸瘰癧法

灸瘰癧以手仰置肩上微舉肘取肘骨尖上是穴隨
所患處左即灸左右即灸右艾炷如小筋頭許三壯
即愈復作即再灸如前不過三次永絕根本先倅湯
壽資宰鍾離有一小環病瘡已破傳此法於本州一
漕官早灸晚間膿水已乾凡兩灸遂無恙後屢以治
人皆驗駱安之妻患四五年瘡痂如田螺靨不退辰
時着灸申後即落所感頗深凡三作三灸遂除根矣

方百乙

瘰癧出白瀝

虎林黃氏女生瘰癧環項及腋凡十九竅竅出白瀝

右手拘攣不可動作大熱家人咸憂趣匠制棺衾周漢卿爲剔竅母長二寸其餘以火次第烙數日成痂痂脫如恒人

續文粹

繫瘤法

芫花根淨洗帶溫不得犯鐵器於木石器中搗取汁用線一條浸半日或一宿以線繫瘤經宿卽落如未落再換線不過兩次自落後以龍骨并訶子末傅瘡口卽合依上法繫如痔累用得效繫瘤法蘇耽良方亦有用蜘蛛者然費力不如此徑捷如無根只用花泡濃水浸線亦得趙氏家姊嘗用以繫腰間一瘤不半日卽落亦不痛

百乙方

瘤

戴人在西華衆人皆訕以爲吐瀉而已一日魏壽之與戴人入食肆中見一夫病一瘤正當目上綱內皆色如灰李下垂覆目睛不能視物戴人謂壽之曰吾不待食熟立取此瘤魏未之信也戴人曰吾與爾取此瘤何如其人曰人皆不敢割戴人曰吾非用刀割別有一術焉其人信之乃引入小室中令俛臥一牀以繩束其脰刺委中大出血先令以手揉其目瘤上亦刺出雀糞立平出戶壽之大驚戴人曰人之有技可盡窺乎

膠瘤

邵城戴人之鄉也一女子年十八未嫁兩手背皆有瘤一類雞距一類角丸腕不能釧向明望之如桃膠

然夫家欲棄之戴人見之曰在手背者爲膠瘤在面者爲粉瘤此膠瘤也以銚鍼十字刺破按出黃膠膿三兩匙立平瘤核更不作婚事復成非素明者不敢用此法耳

瘦

新寨一婦年四十餘有瘦三瓣戴人令以醃吐之三涌三汗三下瘦已半消次服化瘦之藥遂大消去夫病在上者皆宜吐亦自有消息之法耳

並儒門事親

黃藥子治瘦

孫真人治瘦一二年者以萬州黃藥子半斤須緊實者若虛而輕卽他處產者用一斤取無灰酒一斗浸固濟器口以糖火烧一伏時停待酒冷卻開令患者

日飲之不令酒氣絕經三五日後以線圍頸覺消卽停飲否則令項細也用火時不可多惟燒酒氣出瓶頭有津卽止火不待經宿也已驗如神忌毒食

痔疾所患不同

醫學博士齊德之云予讀養生必效方見乾義傳僧覺海少年患痔疾其行業比冰霜緣此飽食久坐知痔疾者不必酒色過度故素問云因而飽食筋脉橫解腸癖爲痔治之故不同也以三神丸治之

精義

鈞腸丸療痔

予庚戌除夕痔作時官舍合肥難得醫者取官局鈞腸丸一百二十粒分爲二服熱酒併服之中夜腹間微痛下少結糞旦起已安治證具載本方所以作效

速者以服多故耳

外痔

葱青內刮取涎對停入蜜調勻先以木鷺子煎湯薰洗然後傳藥其冷如冰唐仲舉云嘗有一吏人若此渠族弟親合與之早飯前傳午後以榜紙來謝拜於庭下疾已安矣

灸痔法

鄭器先用之親曾得效其法鳩尾骨尖少偃處卽是穴麥粒大艾炷灸七壯或十四壯甚者二十一壯上瘡發卽安可除根本

並百乙方

馬齒莧治多年惡瘡

李絳記武元衡相國在西川且苦脛瘡燉痛不可堪

百醫無效及到京城呼供奉石濛等數人療治無益有廳吏上此方用之便差其方云瘡多年惡瘡百方不差或痛燉走不已者並爛搗馬齒莧傳上不過三兩度愈

頭項濕癬

劉禹錫云予少年曾患癬初在頸項間偶於楚州賣藥人教用蘆薈一兩研甘草炙半兩末相和令勻先以溫漿水洗癬乃用舊乾帛子拭乾便以二味合和傳立乾差神效

升麻洗斑瘡

唐王琰云比歲有病天行發斑瘡頭面及身須臾周匝狀如火燒瘡皆戴白漿水隨決隨生不治數日必

死治後瘡癩黧一歲方滅此惡毒之氣所爲以水煮升麻綿霑洗之苦酒煮彌佳但躁痛不可忍也又云建武中南陽擊虜初呼爲虜瘡諸醫參詳療之方取好蜜摩瘡上以蜜煎升麻數拭之

外臺秘要

凍瘡

張仲安治凍瘡用黃栢燒存性灰研細以雞子清調傅破者乾摻上神妙

暑瘡

治暑肌膚瘡爛或因搔成瘡多是大暑汗出坐臥濕地致肌膚多瘡爛汁出有一乳姥曰此易差也取乾壁細土末傅之隨手卽差

治一切惡瘡

治一切惡瘡通用藥不效者陳米飯緊作團火煨存性麻油膩粉調傅蘇韜光丁亥年耳上病碎瘡或痛或痒兩月餘百藥不效季倅子長傳此方初不之信試用之次日卽愈辛丑年再作呂仲發顯謨云此證夏以痰飲治之故只用肥皂燒存性生油膩粉調傅尤佳

並集成

婦人疝蟲陰蝕

陳良甫家婢患陰蝕就瘡家療不差蝕處作兩瘡深半寸良甫於消子方中檢得甘草湯方仍以自處蚘蛇膽散不經七日瘡乃平復甚效凡救十八人手下卽活遇斯疾者請流布而傳之

瘰癧

一省掾背項常有瘰癧愈而復生戴人曰太陽血有餘也先令涌泄之次於委中以銚鍼出紫血病更不復作也

濕癬

一女年十五兩股間濕癬長三四寸至膝發痒時爬搔湯火俱不解痒定黃赤水流痛不可忍灸炳薰漂硫黃藺茹白僵蠶羊蹄根之藥皆不效其人姿性妍巧以此病不能出嫁其父母求療於戴人戴人曰能從予言則差父母諾之戴人以銚鍼磨令尖快當其痒時於癬上各刺百餘刺其血出盡煎鹽湯洗之如此四次大病方除此方不書以告後人恐爲癬藥有誤濕淫於血不可不砭者矣

濕蠹瘡

穎臯韓吉卿自髀至足生濕蠹瘡大者如錢小者如荳痒則搔破水到則浸淫狀類蟲行袴鞮愈而復生癩痕四十餘年不差戴人哂之曰此濕蠹瘡也由水濕而得故多在足下以舟車濬川大下十餘行一去如掃渠素不信戴人之醫至此大服

並儒門事親

下疳瘡兼自利

一鄰人年三十餘性狡而躁素患下疳瘡或作或止夏初患自利膈上微悶醫與治中湯兩貼昏悶若死片時而甦脉之兩手皆濇重取畧弦似數予曰此下疳瘡之重者與當歸龍薈丸去麝四貼而利減又與小柴胡去半夏加黃連芍藥川芎生薑五六貼而安

法心

陰頭惡瘡

葛氏云比見人患莖頭腫攻下瘡欲斷者以猪肉湯
漬洗之并用黃連黃柏末塗之又方蜜煎甘草末塗
之千金方

項上五色瘡

項上生瘡如櫻桃大有五色瘡破則項皮斷但逐日

飲牛乳自消得效方

醫說續編卷第十四

